

legis) cum careret terra, dono Regis Henrici Secundi accepit filiam ejus unicam cum honore ejus. Deinde Ludovicus Francus, qui à seditiosis Baronibus evocatus in Angliam, alterum Gilbertum è familia de Gant gladio Comitatus Lincolnæ cinxit; sed ejecto statim Lodovico, hunc pro Comite nemo agnovit, & ipse ultro titulum abjecit. Tunc Radulphus sextus Cestriæ Comes hunc honorem ab Henrico Tertio Rege consequutus est, qui paulo ante mortem Hawisæ sorori suæ, uxori Roberti de Quincy per Chartam Lincolnæ Comitatum dedit quantum ad se pertinet, ut inde Comitissa existat. Sic se habent verba Chartæ. Illa itidem contulit Ioanni de Lacy Cestriæ Constabulario & hæredibus, quos è Margareta filia sua susciperet. Ille vero Edmundum suscepit, qui ante matrem defunctus hunc honorem filio suo Henrico fruendum reliquit, qui ultimus ex ea stirpe Comes fuit. Cum enim filii ejus immatura morte prærepti essent, & tantum filiola Alicia superesset, illam novennem Thomæ filio Edmundi Lancastriæ Comitis desponsavit ea lege, ut si ipse sine hæredibus de corpore suo decederet,

aut si illi sine hæredibus de corporibus suis immoerentur, ejus Castra, Dominia, &c. remaneret Edmundo Comiti Lancastriæ & ejus hæredibus in perpetuum. Alicia vero ex Thoma marito prolem suscepit nullam. Sed cum Thomas maritus capite plecteretur, illa quæ impudicis moribus labeculam sibi non minimam asperit, Eubulonem *Le Strange* quo cum familiarius vixerat, in maritum sine * Principis assensu * Edw. 2. assumpsit, qui hinc irritatus in ejus possessiones involavit. Quas omnes, cum Alicia jam grandævā diem obiisset sine sobole, Henricus Comes Lancastriæ nepos Edmundi ex filio secundo amplissimum hoc patrimonium ex forma transcriptionis, quam modo dixi, accepit, quod jam inde Lancastrensi familiæ accrevit. Nomine tamen Lincolnensium Comitum honoraverunt Reges Angliæ, Edwardus Quartus, Ioannem *De-la-pole*, & Henricus Octavus Henricum *Brandon* Suffolciensium Ducum filios, qui ambo sine sobole è vita discesserunt: & Elizabetha Regina Edwardum Baronem *Clinton*, magnum Angliæ Thassiarcham eodem honore adauxit, quo ejus filius honoratiss. Henricus hodie gaudet.

Vide Duces Suffolciæ.

In hoc Comitatu Paræciæ sunt plus minus 630.

